

Dia 13 di januari lo cuminsa traha riba Stadhuis

ORANJESTAD – Entrante dia 13 di januari lo cuminsa cu e trabounan di mantencion di stadhuis. Dia 9 di december 2013 tur e partidonan envolvi a firma e acuerdo pa cuminsa cu e trabounan di mantencion. E trabounan lo ta bou di guia di Monumentenbureau cu tambe ta e arkitecto den e proyecto aki y tin planea pa keda cla den aproximadamente 5 luna.

E compania encarga cu e mantencion di e edificio ta Van Kessel Havenbouw NV. Durante e temporada di mantencion e trabounan den Censo lo continua normalmente, pero pa loke ta trata casamento, esakinan lo tuma luga den e periodo di 20 di januari te cu 10 di februari na edificio di Fort Zoutman. Ora e trabounan termina e parehanan lo por contrae matrimonio atrobe den un sala di Stadhuis completamente drecha.

PERCURA PA FINALISA



E contratista lo percura pa finalisa e parti di mantencion di e sala di matrimonio prome, pa despues continua cu e edificio di Ex Hotel Colombia. Durante ful e proceso di mantencion e trahadonan di Censo lo sigui traha den e edificionan cu tur inconveniencia cu esaki lo por trece.

Ta spera cu publico lo por tene cuenta y comprension pa cu e cambionan aki y si ta posibel haci mas tanto uzo di e hulp bestuurskantoor.

UZA HULPBESTUURSKANTOOR

Aunke cu e hulpbestuurskantoor no ta cay bou di Censo ora ta trata di registro di 5.- nan tambe por duna e servicio aki.

Por favor pa locual ta e registro di 5.- haci completamente uzo di e hulpbestuurskantoor. Asina ta duna oportunidad pa locual por na Censo so, y por tin mas espacio pa cu esaki.

EDIFICIONAN A BAY ATRAS

Lamentablemente den e ultimo añanan e edificionan pa loke ta trata mantencion a bay bastante atras y esaki a causa basta in comodidad tanto pa e trahadonan y e publico cu ta haci uzo di e edificio diariamente y p'esey Stichting Monumentenfonds awo lo

inverti den un mantencion grandi pa e edificionan di Censo, mirando e importancia cu e edificio aki tin tanto pa Censo como pa nos local y turistanan cu ta contrae matrimonio diariamente akinan.

RESTAURA COMPLETAMENTE

E edificio aki caminda Stadhuis ta ubica, ta consisti di dos edificio e prome edificio ta ex Hotel Colombia construi na 1918 y e otro edificio a wordo construi na 1925 pa Dr Eloy Arends, na 1986 e heredero di Eloy Arends a bende e edificionan aki cu Gobierno di Aruba.

Na aña 1997 e edificio a wordo restaura completamente. For di aña 1999 e edificionan aki ta bou di maneho di Stichting Monumentenfonds Aruba.

E contratista lo haci tur esfuerso pa finalisa e trabounan den e tempo stipula. Stichting Monumentenfonds Aruba ta gradici tambe na censo pa nan colaboracion durante e trabounan cu lo bay tuma luga.

